



**PERUTUSAN DATUK BANDAR  
MESYUARAT MAJLIS BIL. 4/2023  
19 APRIL 2023 (28 RAMADHAN 1444H)**

بِسْمِ اللَّهِ الرَّحْمَنِ الرَّحِيمِ

Assalamualaikum WBT dan Salam Sejahtera.

1. Alhamdulillah, bersyukur ke hadrat Allah SWT kerana dengan izin dan limpah kurnia-Nya dapat kita bersama-sama berkumpul pada di bulan Ramadhan yang mulia ini dalam Mesyuarat Majlis yang keempat pada tahun ini. Saya ingin mengucapkan ribuan terima kasih kepada Ahli-ahli Majlis, Ketua-ketua Jabatan, pegawai-pegawai dan warga kerja Majlis Bandaraya Petaling Jaya di atas kerjasama dan komitmen yang diberikan bagi memastikan setiap perancangan dan program yang telah dirancang dapat dilaksanakan dengan baik. Justeru itu, saya sangat berharap agar kerjasama ini sentiasa dipertingkatkan dalam semangat profesionalisme yang tinggi.
2. Saya akan sentiasa menitikberatkan perkhidmatan yang berkualiti dan berintegriti diberikan kepada warga Petaling Jaya sesuai dengan aspirasi dan kehendak penduduk Petaling Jaya. Komitmen

yang jitu serta semangat kerja berpasukan merupakan elemen terpenting yang perlu dipraktikkan bagi mencapai iltizam dan hasrat Kerajaan Negeri ke arah kemajuan yang lebih pesat dan makmur terutamanya di kawasan pentadbiran Majlis Bandaraya Petaling Jaya.

**Tuan-tuan dan puan-puan yang dihormati sekalian,**

3. Baru-baru ini, Majlis Bandaraya Petaling Jaya telah menerima kunjungan hormat delegasi daripada Yayasan Warisan Anak Selangor (YAWAS) yang merupakan anak syarikat Kerajaan Negeri Selangor di bawah seliaan Menteri Besar Incorporated (MBI). Kunjungan ini bertujuan untuk mendapatkan maklumat dan mendengar perkongsian pengalaman MBPJ mengenai pelaksanaan Inisiatif Bandaraya Mesra Kanak-Kanak Petaling Jaya di samping perkongsian maklumat daripada pihak YAWAS mengenai program-program kesejahteraan keluarga di Selangor.
4. Alhamdulillah, Puan TPr. Sharipah Marhaini Bt Syed Ali, Timbalan Datuk Bandar Petaling Jaya telah mencadangkan satu usahasama bersama pihak YAWAS dan Kelab Wanita IRIS MBPJ bagi pelaksanaan program kepada golongan wanita yang bergelar ibu dan ibu-ibu mengandung mengenai pendidikan awal kanak-kanak yang memfokuskan kepada aspek pemakanan sihat (anak seawal usia 1 – 4 tahun), kesihatan tubuh badan dan mental serta pelbagai lagi aspek kesejahteraan dan kesihatan keluarga.
5. Kerjasama yang terjalin ini akan turut membantu Negeri Selangor untuk menjadi sebuah negeri yang mesra kepada golongan kanak-kanak dan memperkasakan lagi program-program kesejahteraan kanak-kanak di bawah pihak YAWAS.

## **Tuan-tuan dan puan-puan yang dihormati sekalian,**

6. Majlis Bandaraya Petaling Jaya telah melaksanakan Program Jalinan Kasih 3R PJKita. Objektif program ini adalah untuk mengurangkan sisa sampah yang terjana daripada dibuang terus ke tapak pelupusan sampah. Inisiatif ini adalah rentetan daripada kesan penduduk di Petaling Jaya yang menghasilkan 600 tan sampah setiap hari.
7. Majlis telah membelanjakan sebanyak **RM 85 juta** bagi perkhidmatan kutipan sampah dan pembersihan awam di mana sejumlah **RM 8.3 juta** adalah fi bagi pelupusan sampah.
8. Kos ini dijangka akan meningkat sebanyak 35 peratus (%) lagi dengan kuantiti sampah yang semakin bertambah dan kadar fi dinaikkan kepada RM 55.00 satu tan berbanding RM 36.00 satu tan menjelang tahun 2024 dengan pembinaan *Integrated Solid Waste Management Centre (ISWMC)*.
9. Seiring dengan itu, Majlis akan sentiasa mengambil langkah terbaik bagi meningkatkan kadar kitar semula, termasuk memberi perhatian penuh kepada idea pengurangan penggunaan sumber di peringkat perancangan, reka bentuk dan guna semula peralatan secara berulang kali. Secara tidak langsung, melalui kaedah ini Majlis dapat menjimatkan kos perbelanjaan bagi pengurusan kutipan sampah di petaling jaya.
10. Pada masa sama, Majlis turut mensasarkan penyertaan bilangan isi rumah bagi program kitar semula sebanyak 30 peratus (%) pada tahun ini dan dijangka akan diperluas ke semua kawasan pentadbiran Majlis menjelang tahun 2025.

11. Dalam pada masa yang sama, sejak dari tahun 2019 sebanyak 20 keluarga daripada golongan miskin dan B40 yang memerlukan telah menerima sumbangan barangan terpakai hasil daripada kutipan Program *Spring Cleaning* yang telah diadakan pada setiap musim perayaan utama Malaysia. Kebanyakan barangan *bulky waste* yang diterima daripada program tersebut adalah masih dalam keadaan baik untuk digunakan.
12. Jabatan Pembangunan Masyarakat dan Ahli-Ahli Majlis telah mengenal pasti 11 keluarga yang memerlukan bertujuan untuk menerima sumbangan barangan terpakai seperti pakaian dan perabot terpakai bersempena dengan Hari Raya Aidilfitri pada tahun ini
13. Untuk makluman semua, terdapat sebanyak 12 jenis barangan yang boleh dikitar semula atau digunakan semula diterima di ruangan *drop-off* PJ Eco Recycling Plaza seperti mainan, majalah atau novel, alat tulis dan ini juga termasuklah pakaian terpakai. Pada tahun lepas, sebanyak 11,657 kg pakaian terpakai telah diterima.
14. Bagi barangan perabot dan barangan elektrik terpakai pula sebanyak 742 Unit yang telah diterima pada Program *Spring Cleaning* tahun lepas yang dianggarkan seberat 17,713 kg. Dengan adanya penerimaan barangan terpakai ini, punca pendapatan PJ Eco Recycling Plaza juga turut terjana melalui jualan harga berpatutan yang dilaksanakan di Ruangan *Ecoshop*.

## **Tuan-tuan dan puan-puan yang dihormati sekalian,**

15. Selaras dengan pelaksanaan pelan PJSSR 2030 di bawah *Thematic Low Carbon City*, MBPJ telah menawarkan skim rebat cukai taksiran kepada pemilik rumah yang mesra alam hijau di kawasan Petaling Jaya kepada penduduk Petaling Jaya yang telah dilaksanakan sejak tahun 2011. Skim ini merupakan insentif kewangan oleh MBPJ kepada penduduk Petaling Jaya melalui diskaun cukai taksiran tahunan dan Majlis merupakan Pihak Berkuasa Tempatan (PBT) pertama di Malaysia yang melaksanakan skim seumpama ini.
16. Skim ini bertujuan untuk menggalakkan penduduk mengamalkan gaya hidup yang mesra alam yang akan membantu menjadikan Petaling Jaya sebuah bandar raya hijau berkarbon rendah. Rebate cukai taksiran sebanyak 100 peratus (%) atau RM 500, yang mana lebih rendah ditawarkan kepada pemilik rumah yang melaksanakan inisiatif menjadikan bangunan kediaman mereka mesra alam dari segi 5 aspek alam sekitar iaitu tenaga, air, kepelbagaian biologi, pengurusan sisa buangan dan pengangkutan.
17. Sejak diperkenalkan pada tahun 2011 sehingga tahun 2022, MBPJ telah menerima sebanyak 2,268 permohonan daripada penduduk Petaling Jaya dan daripada jumlah itu, 2,048 penduduk telah layak mendapatkan rebat yang berjumlah RM798,129.39. Dari segi pengurangan pelepasan karbon dioksida bagi kawasan Petaling Jaya, MBPJ telah berjaya mengurangkan sebanyak 397.07 tan CO<sub>2</sub> daripada sasaran keseluruhan pengurangan karbon MBPJ iaitu 1,048,800 tan CO<sub>2</sub> menjelang tahun 2030 melalui pelaksanaan skim ini.

18. Pada tahun 2023, MBPJ sekali lagi telah menawarkan skim ini kepada penduduk Petaling Jaya di mana tahun ini merupakan tahun ke-13 pelaksanaan skim ini. Borang permohonan boleh diperolehi di kaunter Jabatan Pengurusan Sisa Pepejal Dan Pembersihan Awam di Tingkat 20, Menara MBPJ atau memuat turun di laman sesawang MBPJ. Setiap permohonan akan dinilai oleh panel penilai bebas bertauliah yang dilantik oleh Majlis. Pemohon yang layak akan menerima rebat yang dikreditkan terus ke dalam akaun cukai taksiran pemilik rumah pada tahun hadapan. Tarikh tutup permohonan adalah pada 30 Jun 2023. Untuk sebarang pertanyaan boleh hubungi urusetia Sekretariat Pasukan Petugas *Low Carbon Green City of* Petaling Jaya, Jabatan Pengurusan Sisa Pepejal dan Pembersihan Awam MBPJ di talian 03-7954 1440 atau faks: 03-7954 1579 atau email: [rebatcukai@mbpj.gov.my](mailto:rebatcukai@mbpj.gov.my).

**Tuan-tuan dan puan-puan yang dihormati sekalian,**

19. Majlis Bandaraya Petaling Jaya komited dalam penjimatan penggunaan kertas selaras dengan konsep Low Carbon. Ia juga selaras dengan hasrat Majlis semenjak tahun 2010 lagi kearah *paperless* di semua peringkat organisasi.
20. Untuk makluman semua, Majlis telah menggunakan cakera padat bagi menggantikan kertas bagi penyediaan agenda mesyuarat, minit mesyuarat dan laporan mesyuarat sehingga tahun 2017. Selepas itu, Majlis telah menggunakan medium *Google Drive* dan melalui e-mail bagi penyediaan agenda, minit dan laporan mesyuarat kepada ahli mesyuarat bagi sesuatu jawatankuasa mesyuarat.

21. Bagi memperkasakan penjimatan penggunaan kertas ini, Majlis melalui Jabatan Khidmat Pengurusan telah membentangkan kertas pada Mesyuarat Pengurusan Tertinggi dan telah mengesyorkan beberapa langkah penjimatan seperti menghadkan penggunaan kertas untuk mencetak agenda dan minit mesyuarat kepada Datuk Bandar, Timbalan Datuk Bandar, Pengerusi Mesyuarat dan Urusetia Mesyuarat sahaja.
22. Selain itu, cetakan adalah dengan menggunakan kedua-dua belah muka surat dan memaksimumkan ruangan kertas. Ia juga merangkumi had penggunaan kertas berwarna sebagai pembahagi lampiran sebaliknya menggunakan penanda *tagging* atau indeks *separator* sahaja, mencetak draf agenda mesyuarat pada kertas kitar semula, tidak menggunakan surat untuk panggilan mesyuarat namun menggunakan medium seperti *WhatsApp* atau e-mail dan penggunaan skrin secara menyeluruh semasa mesyuarat berlangsung.
23. Seajar dengan PJSSR 20230, Majlis melihat pemerkasaan penjimatan penggunaan kertas ini perlu ditambah baik dari semasa ke semasa bagi mengurangkan kesan pencemaran daripada sisa buangan seperti kertas selain ke arah alam sekitar yang lestari.

**Tuan-tuan dan puan-puan yang dikasihi sekalian,**

24. Baru-baru ini, telah tular *footage* video di media sosial berkenaan insiden kekasaran dan pergelutan melibatkan anggota MBPJ dengan orang awam semasa operasi penangkapan anjing liar di kawasan Taman Kanagapuram, Seksyen 18, Petaling Jaya.

25. Ekoran penularan video yang 'separa lengkap' ini, Majlis telah menerima pelbagai kecaman dan cemuhan dari pelbagai pihak tanpa meneliti insiden sepenuhnya terlebih dahulu.
26. Untuk makluman semua, Majlis pada 25 Februari 2023 telah menerima aduan daripada orang awam bahawa beliau telah dikejar dan hampir digigit oleh anjing liar di Jalan 18/17, Taman Kanagapuram, Seksyen 18, Petaling Jaya. Anjing liar di Jalan 18/17 ini turut mengancam pelajar-pelajar sekolah berdekatan (Sekolah Rendah Kebangsaan Petaling 1 & 2). Berikutan kejadian ini dan kesedaran sivik beliau yang tinggi, beliau telah memohon MBPJ untuk mengambil tindakan. Susulan daripada itu, operasi menangkap anjing liar di kawasan berkenaan telah dijalankan oleh Unit Kacau Ganggu, Jabatan Perkhidmatan Kesihatan Dan Persekitaran MBPJ pada 6 Mac 2023, 8.00 malam hingga 10.00 malam di mana sebanyak 6 ekor anjing liar berjaya ditangkap.
27. Namun, pengadu yang sama sekali lagi telah membuat aduan pada 20 Mac 2023 di mana masih terdapat 6 hingga 8 ekor anjing liar yang masih berkeliaran di Jalan 18/17 dan dikhuatiri boleh mendatangkan kecederaan kerana musim persekolahan telah bermula. Menurut pengadu, anjing-anjing tersebut dijaga oleh seorang lelaki yang bekerja di Syarikat Perusahaan Jaksa Bersatu Sdn. Bhd., No. 7, Jalan 18/17.
28. Atas kemaslahatan umum, sekali lagi operasi menangkap anjing liar di kawasan berkenaan dijalankan pada 22 Mac 2023, antara jam 8.00 malam hingga 10.00 malam di mana sebanyak 4 ekor anjing liar berjaya ditangkap. Berdasarkan rekod, sepanjang tahun 2020 hingga Mac 2023, sebanyak 16 aduan anjing liar di kawasan



Taman Kanagapuram telah diterima oleh MBPJ dan disusuli dengan tindakan 12 kali operasi melibatkan 39 ekor anjing liar telah berjaya ditangkap.

29. Masalah gangguan anjing liar ini tidak boleh dipandang remeh dan perlu ditangani segera khususnya oleh Pihak Berkuasa Tempatan (PBT). Selain daripada mengganggu ketenteraman awam dengan bunyi bising apabila sering bergaduh dan menyalak pada waktu malam, membuang najis merata-rata dan menyelongkar tong sampah untuk mencari makanan hingga mengotorkan kawasan persekitaran, anjing liar juga boleh mengancam keselamatan dan kesihatan orang awam terutama kanak-kanak.
30. Selain daripada kucing liar, kelawar dan monyet, anjing liar merupakan agen utama pembawa Virus Rabies atau Anjing Gila. Gigitan anjing liar yang dijangkiti Virus Rabies kepada manusia boleh menyebabkan penyakit sistem saraf (neurologi) kronik yang boleh membawa maut kerana virus ini akan menyerang otot, sekali gus menyukarkan penafasan dan menjejaskan fungsi otak. Oleh yang demikian, operasi penangkapan anjing liar perlu segera dilaksanakan sebagai langkah berjaga-jaga membendung jangkitan Virus Rabies atau Anjing Gila sebelum merebak menjadi wabak penyakit yang sukar dikawal.
31. Sebagai sebuah organisasi yang menjunjung tinggi amalan integriti, Majlis telah menyerahkan kes ini dengan serta merta kepada Polis DiRaja Malaysia (PDRM) untuk siasatan yang lebih telus dan jika didapati bersalah, MBPJ tidak akan melindungi anggota terlibat dari sebarang salah laku.

32. Berdasarkan maklum balas rasmi Ibu Pejabat Polis Daerah Petaling Jaya bertarikh 9 April 2023, satu laporan polis telah dibuat oleh pengadu pada 24 Mac 2023 mendakwa anggota MBPJ telah mencederakan beliau semasa tangkapan anjing liar pada 22 Mac 2023. Satu kertas siasatan telah dibuka oleh Pegawai Penyiasat di bawah Seksyen 324/186 Kanun Keseksaan.
33. Pada 29 Mac 2023 kertas siasatan telah dirujuk kepada YA Timbalan Pendakwa Raya Selangor dan arahan tuduh pengadu di bawah Seksyen 186 Kanun Keseksaan kerana menghalang anggota MBPJ daripada menjalankan tugasnya iaitu menangkap anjing liar yang dilaporkan oleh orang awam. Pengadu telah dituduh pada 31 Mac 2023 di Mahkamah Petaling Jaya. Manakala, tiada pertuduhan terhadap anggota MBPJ dikenakan oleh PDRM kerana alat penangkap anjing terkena muka pengadu dengan tidak sengaja semasa pergelutan berlaku.
34. Selain daripada menyerahkan kes ini kepada Polis DiRaja Malaysia untuk disiasat dan diambil tindakan mengikut saluran undang-undang, MBPJ turut menjalankan siasatan dalaman dan jawatankuasa siasatan dalaman membuat pengesyoran untuk menambahbaik tatakelola dan kaedah melaksanakan operasi menangkap anjing liar dengan cara pengenalan kepada tahap risiko sesuatu operasi bagi menentukan kaedah operasi yang akan dilaksanakan.
35. Operasi dengan risiko yang rendah menetapkan kakitangan yang menjalankan operasi hendaklah dipasang kamera badan (*bodycam*), gambar semasa operasi akan diambil untuk rekod oleh pegawai atasan kakitangan berkenaan dan bagi tahap risiko tinggi

akan dijalankan secara bersepadu bersama pihak Polis. Bagi memastikan proses menangkap anjing liar ini lebih telus, MBPJ turut mencadangkan/mengsyorkan wakil NGO dan persatuan penduduk bersama-sama semasa operasi.

**Tuan-tuan dan puan-puan dikasihi sekalian,**

36. Sebelum saya mengakhiri ucapan, berikut merupakan pengumuman untuk makluman, perhatian dan tindakan kita bersama.
37. Majlis Bandarya Petaling Jaya telah selesai diaudit oleh SIRIM QAS International Sdn. Bhd bagi pensijilan ISO 37001:2016 ABMS. Auditan SIRIM ini bermula pada 23 Mac 2023 (peringkat pertama) dan peringkat ke dua pada 29 hingga 31 Mac 2023.
38. Untuk makluman semua, Alhamdulillah, Majlis telah berjaya mendapatkan pensijilan ABMS daripada SIRIM QAS International bagi kategori sistem pengurusan *Anti-Bribery* bagi perkhidmatan Pihak Berkuasa Tempatan (PBT) bagi bandaraya Petaling Jaya (merangkumi perkhidmatan utama dan sokongan kerajaan tempatan).
39. Syabas dan tahniah saya ucapkan kepada semua diatas kerja keras yang melibatkan semua jabatan dan unit dalam penyediaan dokumentasi ABMS. Kini cabaran buat Majlis adalah bagi memastikan kepatuhan terhadap segala kriteria kawalan anti rasuah sepenuhnya agar pensijilan ABMS Majlis dapat dikekalkan dan diperbaharui setiap tahun oleh pihak SIRIM dalam mempertingkatkan imej Majlis ke arah yang lebih baik.

40. Diharapkan, melalui pengiktirafan pensijilan ABMS ini, ianya dapat menambah keyakinan masyarakat mahupun *stakeholder* terhadap perkhidmatan yang diberikan dan ditawarkan oleh Majlis Bandaraya Petaling Jaya sterusnya membantu pihak kerajaan negeri dalam memperbaiki kedudukan indeks persepsi rasuah (CPI) negeri. Secara tidak langsung ianya berupaya memperbaiki kedudukan CPI negara ke tahap lebih baik diperingkat antarabangsa. In Sya Allah.

**Tuan-tuan dan puan-puan dikasihi sekalian,**

41. Untuk makluman, Majlis Bandaraya Petaling Jaya telah membuat penutupan jalan/simpang semasa pelaksanaan laluan kontra bermasa pada 1 Mac 2023 yang lalu bermula pada pukul 5.00 petang hingga 7.30 malam. Antara jalan/simpang terlibat ialah Persimpangan Jalan Othman – Jalan Templer, persimpangan Jalan Gasing – Jalan Templer, persimpangan Jalan Templer – Jalan 6/29 dan setiap bukaan median di Jalan Templer.
42. Penutupan jalan/persimpangan ini di buat semasa perlaksanaan laluan kontra sahaja untuk tempoh percubaan selama 3 bulan. Majlis akan mula mengaktifkan laluan kontra ini bermula pada pukul 5.00 petang sehingga pukul 7.30 malam setiap hari kecuali Sabtu, Ahad, cuti umum dan ketika hujan.
43. Berdasarkan daripada tempoh percubaan tersebut, Majlis telah membuat keputusan untuk **tidak meneruskan penutupan** jalan/simpang di persimpangan Jalan Templer – Jalan Gasing – Jalan Othman dan penutupan median di Jalan Templer.

44. Penutupan ini akan ditamatkan pada hari ini, 19 April 2023 (Rabu) dan laluan kontra tanpa penutupan simpang akan dilaksanakan berkuatkuasa pada 2 Mei 2023.

**Tuan-tuan dan puan-puan dihormati sekalian,**

45. Jumlah kes demam denggi yang dilaporkan pada minggu ke 14/2023 adalah 81 kes, menjadikan jumlah kumulatif sebanyak 1,286 kes yang dilaporkan. Keadaan ini menunjukkan penurunan 12 peratus (%) daripada jumlah kes pada minggu sebelumnya iaitu 92 kes. Jumlah lokaliti wabak adalah 37 lokaliti, manakala lokaliti wabak aktif pada minggu epid 13 adalah sebanyak 7 lokaliti. Tiada wabak baru dilaporkan, 4 lokaliti wabak tak terkawal dilaporkan dan 3 lokaliti wabak *hotspot* dicatatkan. Tiada kes kematian baru yang dilaporkan.
46. Sehubungan dengan itu, bersempena dengan musim perayaan sambutan Hari Raya Aidilfitri yang bakal tiba tidak lama lagi, Majlis ingin mengingatkan agar tuan/puan mengambil langkah-langkah pencegahan demam denggi seperti **luangkan masa 10 minit untuk membersihkan kawasan luar dan dalam rumah sebelum pulang beraya ke kampung, gunakan Abate atau racun jentik-jentik dalam tempat simpanan air di luar dan dalam rumah.**
47. Selain itu, tuan/puan juga mestilah **memastikan bekas-bekas yang boleh menakung air di luar rumah diterbalikkan dan elakkan berkunjung ke rumah saudara mara ketika waktu senja (waktu nyamuk sedang aktif mengigit) dan dapatkan rawatan awal di mana-mana klinik kesihatan sekiranya demam.** Semoga kegembiraan menyambut lebaran kali ini tidak

diragut dengan jangkitan demam denggi akibat kelalaian kita sendiri

48. Alhamdulillah, sedar tak sedar, hari ni kita telah memasuki hari yang ke 28 di dalam bulan Ramadhan yang penuh barakah ini. Justeru, dikesempatan yang ada ini, saya mewakili seluruh pegawai dan kakitangan warga Majlis Bandaraya Petaling Jaya ingin mengucapkan selamat menyambut Hari Raya Aidilfitri kepada semua yang dijangka disambut beberapa hari sahaja lagi.
49. Kepada mereka yang mahu pulang ke kampung halaman bertemu keluarga dan sanak saudara, saya nasihatkan, berhati-hatilah di jalan raya. Pandu lah dengan cermat dan penuh berhemat. Ingatlah orang yang tersayang.
50. Saya juga ingin mengucapkan syabas dan tahniah kepada Jabatan Pembangunan Masyarakat di atas inisiatif penganjuran program **Balik Raya Dengan Tenang Jom Periksa Kenderaan Percuma** yang telah diadakan pada 17 April (Isnin) yang lalu. Saya difahamkan, pemeriksaan yang melibatkan 18 point utama kenderaan telah diperiksa dengan percuma.
51. Tuan/Puan adalah dijemput ke majlis sambutan Hari Raya Peringkat Negeri (Daerah Petaling) pada 6 Mei 2023, hari Sabtu bertempat di tapak pasar malam Paya Jaras, Sungai Buloh. Sambutan hari raya ini bermula jam 8.00 malam hingga 11.00 malam. Untuk makluman semua, urusetia induk bagi sambutan perayaan peringkat negeri daerah Petaling ini adalah Pejabat Daerah dan Tanah Petaling.

52. Akhir sekali, saya juga ingin menjemput Tuan/Puan dan semua warga Majlis Bandaraya Petaling Jaya ke rumah terbuka MBPJ atau **Riang Raya@PJ 2023** yang akan di adakan pada **19 Mei 2023 (Jumaat)** bersamaan dengan 28 Syawal bermula jam 8.00 malam di Laman MBPJ. Pelbagai juadah menarik yang akan disediakan menanti tuan/puan semua. In Sya Allah, penyelarasan jemputan kepada tuan/puan akan dikeluarkan nanti

**Selamat Hari Raya Aidilfitri,**

**Maaf Zahir dan Batin.**

**Sekian, terima kasih.**